

Mid-Day Dogri News Bulletin, 13th March 2025

समे – 12:25

<><><><><><>

CM Tourism

जम्मू-कश्मीर सरकारै अज्ज आखेआ ऐ जे सैलसफा, जम्मू-कश्मीर दी अर्थबवस्था दा इक महत्वपूर्ण अंग ऐ ते एह् प्रदेश दे सकल घरेलू उत्पाद ते रोजगार पैदा करने च बड़ा मता जोगदान देआ करदा ऐ। एह् खेत्तर, प्रदेश च प्रतक्ख ते अप्रतक्ख ढंगै'नै केई लोकें गी रोजगार देआ करदा ऐ। एह् जानकारी मुख्यमंत्री ओमर अब्दुल्ला होरें विधानसभा च इक सोआलै दे परते च सांझी कीती। उ'नें आखेआ जे प्रदेश च सैलसफा दिएं बक्ख-बक्ख किस्में जि'आं रोमांच आहले सैलसफा, गोल्फ सैलसफा, पर्यावरण सरबंधी सैलसफा, धार्मिक सैलसफा ते सांस्कृतिक ते विरासती सैलसफा गी बढ़ावा देने दे मकसद कन्नै केई जतन कीते जा'रदे न। ओमर होरें दस्सेआ जे सरकार आसेआ गुरेज, केरन, बंगस, तोशामैदान, अहरबल, दुधपत्थरी, मचेल, भद्रवाह, सुकराला माता ते पंचैरी ज्नेई थाहरें गी सदाबहार सैलानी थाहरें दे तौर उप्पर विकसित करने बक्खी चेचा ध्यान दित्ता जा करदा ऐ।

<><><><><><>

LA Handicrafts

जम्मू-कश्मीर सरकारै आखेआ ऐ जे पाड्डर-नागसेनी हलके च मुकामी दस्तकारी खासतौर उप्पर पाशमीना ते होरनें पारंपरिक दस्तकारिएं गी बढ़ावा देने लेई सरबंधत विभाग आसेआ केई योजनाएं गी अमल च आंदा जा करदा ऐ। सुनील कुमार शर्मा हुंदे आसेआ विधानसभा च पुच्छे गेदे इक सोआलै दे जोआब च उद्योग मंत्री होरें एह् जानकारी सांझी कीती। उ'नें दस्सेआ जे किश्तवाड़ जिले च 10 मंजूरशुदा केन्द्रें दे राहें बक्ख-बक्ख दस्तकारिएं दी सिखलाई दित्ती जा करदी ऐ ते बुनाई आहले शोबे च तकरीबन 80 नौजवानें गी सिखलाई दित्ती गेदी ऐ। उ'नें दस्सेआ जे पिच्छले त्रै ब'रें दरान पाड्डर-नागसेनी हलके थमां 27 मामलें गी प्रायोजित कीता गेआ ऐ।

<><><><><><>

LA Safai Karamcharies

जम्मू-कश्मीर सरकार नै अज्ज आखेआ ऐ जे प्रदेश दे शैहरी मुकामी इदारे च कम्म करै करदे सफाई कर्मचारिएं दी गिनतरी 7 ज्हार 3 सौ 53 ऐ। इंदे चा मते सारे सफाई कर्मचारिएं अपनी सेवा दे 10 शा 15 ब'रे पूरे करी लैते दे न ते ओह पक्के औहद्धें पर कम्म करै करदे न। छड़ा किश गै सफाई कर्मचारी कैजुअल बिनाह उप्पर सेवां देआ'रदे न। डाक्टर भारत भूषण हुंदे आसेआ विधानसभा च पुच्छे गेदे इक सोआलै दे परते च सरबंधत मंत्री होरें एह जानकारी सांझी कीती।

<><><><><><>

LA Stadium

जम्मू-कश्मीर सरकारै आखेआ ऐ जे अखनूर आहले इन्डोर स्टेडियम दी हालत खस्ता नेई ऐ ते ओह खरी चाल्ली कम्म करै करदा ऐ। इस स्टेडियम दे खेड्ड मैदान च छड़ा पैविलियन ढांचे आहले इमारत गी गै नुक्सान पुज्जे दा ऐ। मोहन लाल हुंदे आसेआ विधानसभा च पुच्छे गेदे सोआलै दे परते च सरबंधत मंत्री होरें एह जानकारी दित्ती।

<><><><><><>

Search Operation

भारती फौज, जम्मू-कश्मीर पुलसा ते सीआरपीएफ आसेआ बांडीपोरा जिले दी गंदबल-हाज्जन सिडकै पर इक सांझी तपाशी अभियान चलाया गेआ जिस दरान द'ऊं संदिग्धें गी हिरासता च लैता गेआ ऐ। हासल होई दी टकोहदी सूह दी बिनाह उप्पर चलाए गेदे इस तपाशी अभियान दरान 1 पस्तौल, पस्तौल दी इक मैगजीन, 2 हत्थगोले, ए.के. दी 1 मैगजीन, ते किश होर असला बरामद कीता गेआ ऐ।

<><><><><><>

DGP Visit

जम्मू-कश्मीर पुलसा दे डरैक्टर जनरल नलिन प्रभात होरें जम्मू दे आईजीपी भीम सेन टूटी हुंदे कन्नै पिच्छले द'ऊं दिनें दरान रजौरी जिले च बक्ख-बक्ख थाहरें दा दौरा लाइयै, बल दिएं कार्रवाईएं मतल्लक तैयारिएं दा जायजा लैता। स्हाड़े रजौरी संवाददाता शक्तिपाल मूजब, डीजीपी होरें इस मौके एसओजी थन्नामंडी ते एसओजी रजौरी च तैनात जवानें कन्नै

गल्लबात कीती ते उं'दी सिखलाई लेई चलाए जा'रदे कार्यक्रमें दा जायजा लैता। रजौरी च कब्जा रेखा दे दौरे दरान डीजीपी होरें बन्ने पर बने दे सुरक्षा हालात दी समीक्षा कीती ते बन्ने पारा थमां घुसपैठ गी रोकने लेई कीते जा करदे हीलें बारै पुलसा दे सीनियर ऐह्लकारें कन्नै गल्लबात कीती।

<><><><><><><>

Andrabi Udh.

जम्मू—कश्मीर वक्फ बोर्ड दिएं अध्यक्ष डाक्टर सैय्यद द्रक्षां अंद्राबी होरें उधमपुर दे ईदगाह च इक जनता दरबार लाया जेह्दे च मन्ने—परमन्ने दे समाजी प्रतिनिधिएं ते मुकामी लोकें हिस्सा लैता ते अपने मसले ते चैंताएं गी पुट्टेआ ते कन्नै वक्फ बोर्ड दे कम्मकाज गी चुस्त—दुरुस्त बनाने लेई अपने सुझाऽ बी दित्ते। वक्फ बोर्ड दे मुख् कार्यकारी अधिकारी ज़हीर कैफी ते होर दुए ऐह्लकार बी इस मौके उत्थे मजूद हे। स्हाड़े उधमपुर संवाददाता अचिन दुबे मूजब, उधमपुर जिले दे उलेमाएं ते इमामें बी इस बैठका च हिस्सा लैता। अपने संबोधन च अंद्राबी होरें आखेआ जे पिच्छले त्र'ऊं ब'रें दरान वक्फ बोर्ड दे कम्मकाज च बड़ा मता सुधार दिक्खने गी लब्धा ऐ ते बोर्ड दिएं सेवाएं च पूरी पारदर्शिता ते जोआबदेही जकीनी बनाने बक्खी ध्यान केन्द्रित कीता जा करदा ऐ। उ'नें आखेआ जे समूलचे केन्द्र शासित प्रदेश च वक्फ दिएं संपत्तिएं दा दर्जा बधाने दे कम्मै गी तोढ़ चाढ़ेआ जा करदा ऐ। डाक्टर अंद्राबी होरें आपू'चै तालमेल बनाइयै कम्म करने दी जरूरतै पर जोर पाया तांजे रमज़ान दे इस पवित्तर म्हीने दरान ते ईद दा जश्न मनांदे मौके बी लोकें गी लोड़चदी सुविधां हासल करोआइयां जाई सकन।

<><><><><><><>

Space X Postponed

स्पेसएक्स नै रॉकेट दे लॉन्चपैड च अखीरी समें च आई दी तकनीकी खराबी करी अंतर्राष्ट्री अंतरिक्ष केन्द्र—आईएसएस लेई तय डुआरी अगड़ी पाई दित्ती ऐ। इस अभियान दा मकसद आईएसएस च चार होर अंतरिक्ष यात्रियें गी भेजना हा तांजे अमरीकी अंतरिक्ष यात्री बुच विल्मोर ते सुनीता विलियम्स दी लम्मे समें थमां बाकी राँहदी बापसी गी जकीनी बनाया जाई सकै। मूल रूप कन्नै ऑर्बिटिंग स्टेशन पर 8एं दिनें तगर रुकने दी योजना बनाई गई ही, पर बोइंग दे खराब होई गेदे स्टारलाइनर पर अपनी यात्रा दे बाद दौनें यात्री 9—वें म्हीनें थमां अंतरिक्ष च फंसे दे न। अधिकारियें हूनै तगर प्रक्षेपण दी नमीं तरीक दा ऐलान नेई कीता ऐ।

यात्रियें दी वापसी च चिर दे बावजूद, अमरीकी अंतरिक्ष एजेंसी—नासा नै भरोसा जताया ऐ जे
दौनें अंतरिक्ष यात्री सुरक्षित न।

<><><><><><>